

Date – 13/03/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizote Kutpui ber Chapchar Kut chu vawiin hian Mizoram hmun hrang hrang ropui taka lawm a ni dawn.
2. Chief Minister Pu Lalduhoma'n Zofate Kut Ropui ber "Chapchar Kut" hlim taka hmang turin hmun hrang hranga zofate duhsakna a hlan.
3. Art and Culture Minister Pu C. Lalsawivunga'n Kut felfai leh thianghlim, midangte nena inremna kut hlimawm tak hmang turin hmun hrang hrangah zofate duhsakna a hlan.
4. Prime Minister Narendra Modia chuan Iran President Masoud Pezeshkian biain West Asia inepna boruak chungchang a sawipui.

<><><>

CHAPCHAR KUT

Mizote Kutpui ber Chapchar Kut chu vawiin hian Mizoram hmun hrang hrangah ropui taka lawm a ni dawn.

SFX of Chapchar Kut

Chapchar Kut lawmna pui ber hi Aizawl Lammual ah hman a ni dawn a, Chief Minister Pu Lalduhoma chuan "Kut Pa" niin a hmanpui dawn a, Art and Culture Minister Pu C. Lalsawivunga chu "Kut Thlengtu" a ni dawn a ni.

"Zonun Zemawi Inremna" tih thupui hmanga Chapchar Kut lawmna hi Mizoram pawna zofate pawhin an lawm dawn a, Kumina lawmna ah hian Hlado chham, Cheraw Kanpui, pawnto, Lengkhawm zai, Parlam, Pipu Zai, Lemchan, thla koh, mizawn inchuh, mal zai, pipu zai, zavai chai-Lera zai, khuallam te leh Mizo hnam thuam leh Mizo infiamna te entir na neih a ni ang a, Hei bakah hian hnam lam chi hrang hrang -singhi chham (sikkim), wangala (meghalaya), hrangkol te neih a ni ang.UD&PA buatsaih faina lawman sem leh Chief Minister Chawimawina Nopui hlanna hun hman a ni dawn a ni.

<><><>

CM : CHAPCHAR KUT

Chief Minister Pu Lalduhoma'n Zofate Kut Ropui ber "Chapchar Kut" hlim taka hmang turin hmun hrang hranga zofate duhsakna a hlan.

Chief Minister chuan kumina Chapchar Kut thupui chu " Zonun Ze Mawi – Inremna" tih anih angin hmun hrang hranga zofate inrem taka awm turin a chah a, Kut chu hlim taka hmang tlang tura chahin Kut hmanna pui ber Lammual ah a thei apiang tel vek turin a sawm a, Chapchar Kut pualin indona, tharum thawhna leh innghirnghona aiin Inremna thlang tura chahin hmun hrang hranga Kut hmangtute duhsakna a hlan a ni.

<><><>

ART & CULTURE MINISTER : CHAPCHAR KUT

Art and Culture Minister Pu C. Lalsawivunga'n Kut felfai leh thianghlim, midangte nena inremna kut hlimawm tak hmang turin hmun hrang hrangah zofate duhsakna a hlan.

Art and Culture Minister chuan Chapchar Kut chu hnam dang leh khualzin tam tak ten an hriatpui tih sawiin mite hriat hlauh kut anih avangin Chapchar Kut pualin mikhualte tha taka lo dawngsawng a, zonun ze mawi hrang hrang lo hmuh tir chu mitin tih makmawh ani a ti a, Kut felfai leh thianghlim, midangte nena inremna kut hlimawm tak hmang turin mitin te duhsakna a hlan a ni.

Pu C. Lalsawivunga chuan Mizo hnam ziarang chu hnam dangte hmuh theih turin tha taka pho lan a pawimawh tih sawiin Mizo hnam chu khawvel mipuite hmuh theiha chawisang zel turin hmun tina zofate a chah a ni.

<><><>

ASSEMBLY

Nimina Assembly thutkhawmah Minister pahnih Pu B. Lalchhanzova leh Pu Vanlalhlana te hna chanpuala demand sawihoa pass a ni.

Niminah hian Minister Pu B. Lalchhanzova department enkawl 3 - Land Revenue & Settlement, Food, Civil Supplies & Consumer Affairs leh Information, Public Relations, Printing & Stationery tana sum ruahman cheng vbch 365, nuai 10 leh sing 7 sang 2 bakah Minister Pu Vanlalhlana department enkawl 3 - Parliamentary Affairs, Transport Department leh Public Works Department-a sum ruahman cheng vbch 446 nuai 45 sing 1 sang 4 te chu sawiho anih hnua pass a ni.

<><><>

CYMA

Central YMA chuan Assembly Budget Session neih mekah 8th Schedule-a Mizo tawng telh a nih theihna tura Assembly House-in Official Resolution a pass chu lawmawm an tih thu an sawi.

Thuchhuah an siamah Central YMA chuan, ram danpui 8th Schedule-a Mizo tawng dah a nih theih nan Central YMA chuan theihtawpin hma an lo la tawh thin an ti a. Kum 1997-a East Lungdar-a YMA General Conference-in Mizo tawng chu India Constitution 8th Schedule-ah telh a nih theih nan YMA-in hmalak ni rawh se” tih a lo rel tawh bakah theihtawpin an bawhzui tih an sawi.

Central YMA chuan, Zofa hnam peng hrang hrangte tawng humhalh a, tihhmasawn a tulzia hriain hma an la thin tih sawiin tuna an hman mek Mizo tawng chu an inbiakpawhna tawng tlanglawn ber a nih avangin inpumkhatna atan a pawimawh a, hma a sawn theihna tur leh a than zelna turin hma an la mek zel tih sawiin, Assembly Budget Session neih mekah ram danpui 8th Schedule-a Mizo tawng dah a nih ve theihna tura, “Eighth Schedule to the Constitution of India-ah Mizo tawng hi telh tura hma lak ni rawh se” tih Official Resolution Pass a ni chu Central YMA chuan lawmawm an ti tak zet an ti a, 8th Schedule-a Mizo tawng telh ve a nih theihna turin theihtawp an chhuah zel dawn tih an sawi a ni.

<><><>

ACADEMIC SESSION

School Education Minister Dr Vanlalhlana leh sawrkar hotute thukhawm chuan kum 2026-2027 High School Academic Session chu April ni 1, 2026 atanga tan ni se tiin a rel.

Nimina School Education Minister Dr Vanlalhlana leh sawrkar hotute thukhawm chuan High School Academic Calendar thar chungchang an rel a, hetah hian Academic Session thar chu April ni 1 atanga tan ni se tih an rel a, First Term Exam leh result puan chu July ni 7 atanga ni 17 chhunga peih fel hman tur niin Second term exam chu July ni 21 ah neih tur a ni a, Third term exam chu November ni 3 atanga tan tura tih a ni a, December ni 21 atanga January ni 5 chu thlasik chawlh atana tih niin Final Result hi leh Result puan hi January ni 18 atanga January ni 29 ah tih fel tura rel a ni.

Meeting ah hian HSLC Examination chu kum 2027 February thla chhunga buatsaih ni se tiin a rel a, Higher Secondary School chu a ngai anga kal tura rel tawh sa niin April ni 1, 2026 ah Class kal tan tur a ni.

<><><>

FCS&CA CIRCULAR

Supply Department-in sorkar laipui thupek angin tuialhthei leh eirawngbawlna gas renchem turin mipui an chah.

Mipui ngenna leh hriattirna an tihchhuah-ah Supply Department chuan, Sorkar laipui-a Ministry of Petroleum and Natural Gas-in thu a chhuah angin tun dinhmunah ram pumah eirawngbawlna gas bakah tuialhthei, petrol leh diesel hman tur chu India-in a chhekkhawl tha a, hman tur an la ngah a. Hetihual hian Middle East buaina leh indona thlen mek avanga harsatna an tawh loh nan mipuite chu a theih ang anga eirawngbawlna gas leh tuialhthei renchem turin an hriattir a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HEALTH MINISTER

Health Minister Pi Lalrinpui'n MPSC-in Health & Family Welfare Department hnuai Mizoram College of Nursing Assistant Professor post 5 lakna tur advertisement tih chhuah tawh hnuhkir a nih chhan chu UGC dan hman a ngaih vang tih a sawi.

Assembly thutkhawma zawhna chhangin Pi Lalrinpui chuan MPSC-in Health & Family Welfare Department hnuai Mizoram College of Nursing Assistant Professor post 5 lakna tur nikum July ni 31-a advertisement tih chhuah tawh kumin January ni 28-a hnuhkir leh chhan ah UGC Regulation, 2018 chu Mizoram MCON-a thawktute hlawh bituk nan kum 2021 atang khan hman ve a ni a ti a. He Regulation hi service condition dangah hman a la nih loh avangin leh hman tur tho a nih baw avangin nikum November ni 11-a DP&AR huaihawta Mizoram Public Service Commission (MPSC) leh Health & Family Welfare Department -te nena Joint Meeting chuan UGC Regulation hi tuna hnalak thar tur atang chuan a pumpuia hman ve law law nise an tih avangin, MPSC-in advertisement a lo tih chhuah tawh chu hnuhkir leh a ni tih a sawi.

<><><>

PM

Prime Minister Narendra Modia chuan Iran President Masoud Pezeshkian biain West Asia inepna boruak chungchang a sawipui. Social Media lamah he thu hi tarlangin Pu Modia chuan inepna boruak sang zel chu a ngai pawimawh tih sawiin civil mi tam tak an thi leh in leh lo tam tak a chhia chu paw atih thu a sawi a. PM Modia chuan India mite himna chu a ngaihpawimawh thu leh bungrua leh energy te tluang taka phurh kual chu a ngaihpawimawh ber anih thu a sawi a. India chuan dawhkan kila buaina chinfel anih theih nana inbiak chu a duh ber anih thu a sawi nawn leh baw a ni.

<><><>

PM

Prime Minister Narendra Modia chuan wawiinah Guwahati atangin PM-Kisan Samman Nidhi scheme dawngtu loneitu vaibelchhe 9 leh nuai 32 chuangte accountah cheng vaibelchhe 18,640 a thun dawn. Puan tawh angina PM Modia hian ni hnih cham turin wawiinah Assam a tlawh dawn a. PM Modia hian a cham chhungin hmasawna hmasawna project chi hrang hrang a hawng dawn a. Naktukah hian Silchar a tlawh ang a,hetah hian hmasawna hnathawh cheng vaibelchhe 24,205 hu a hawng dawn a. Silchar-Guwahati expressway cheng vaibelchhe 22000-a siam tur lungphum a phum baw ang. He expressway hi hmarchhaka a hmasa ber tur a ni a. Km 166-a thui kawngpui zau leh nuam tak tur niin Silchar leh Guwahati inkar darkar 8 tlan ngai thin chu darkar 4 leh a chanve ah a thlen theih tawh dawn a ni.

<><><>